

L'interpender Lebrument ord in'otra optica

Hanspeter Lebrument sco giast al 4. ViamalaTalk ad Andeer

DA RAINER SCHILLING

■ **L'editur Hanspeter Lebrument è stà questa giada il giast dal quart ViamalaTalk che ha gi lieu ad Andeer. Il gestiunari da Regio Viamala Casper Nicca ha moderà la sairada.** A Turitg saja el gia vegnì discredità sco «Berlusconi da las Alps» u sco «assassin da pizzochels», ha l'interpender da 69 onns raquintà al publicum ad Andeer. Cun 23 onns ha il scolast primar midà professiun e daventà schurnalst, oz dirigia el ina da las pli grondas interpresas da medias da la Svizra. Lebrument è bab da dus figls ed ina figlia e tuts trais dirigian ina unitad da l'interpresa. La successiun saja pia garantida, ha ditg Lebrument, senza dentant tradir tgi che è effectivamain destinà per ses successur. Quai saja anc tut avert. Fin qua s'inscuntran tuts quatter, il bab, ils dus figls e la figlia a las sesidas emnilas da la direcziun. «La famiglia è la firma ed il cunrari è la firma era la famiglia», ha ditg Lebrument.

Las dumondas da Caspar Nicca a Hanspeter Lebrument han fatg resortir cunzunt l'uman che stat davos tut questas prestaziuns, decisiuns e scunfitas da l'interpresa Südostschweiz. Betg in mogul da pressa è sa preschentà la mesemna passada a l'auditori en il hotel Posta ad Andeer, mabain in uman fitg comunicativ, critic cun sasez, manavel a l'auditori, dentant era losch.



Hanspeter Lebrument: «La firma è la famiglia ed il cunrari.»

FOTO R. SCHILLING

Sviluppar e realisar

A l'entschatta dals onns 70 ha Lebrument cumenzà a sviluppar ed adattar differentas gasettas, uschia era l'antieriura «Bündner Zeitung». El ha introduci la repartiziun da la gasetta gia la damaun, damai che quella n'è betg ina concurrenza tar il program da televisiun da la saira. El ha bandischà las infurmaziuns internaziunalas da l'emprima pagina ed ha uschia stgaffi plaz per reportaschas regionalas. E sco terz pass ha el deliberà la gasetta dal domini da la partida. Quai na saja betg sa chapi da sasez da quest temp.

Sia carriera professiunala attribuescha Lebrument a ses engaschament en il servetsch militar. «Applitgar al dretg temp en il dretg lieu ils dretgs meds» saja stà sia devisa che haja manà al success. La finamira principala dal collectiv da l'interpresa saja: «L'interpresa na dastga betg far naufragi!» Sco schef veglia el adina esser exempel, gest era quai che pertutga il temp da lavur. Ses temp da lavur saja per ordinari pli lung che quel da ses collavuratur. Sco optimist saja in bun clima da lavur ina premissa essenziala per bunas prestaziuns. Sco partenari da fatschenta saja el «dir en la chaussa, dentant lom en il tun».

Innovaziun e strategia

Hanspeter Lebrument ha accentuà ch'el saja surstà quants buns chaus ch'i dettia en il Grischn. Quai saja er in

ferm potenzial per realisar innovaziuns. Strategia saja d'adattar las prestaziuns als basegns da la clientella. Sco interpresa da medias haja el la finamira da cuntanscher tants clients sco pussaivel che sajan pronts da pagar per ils products da radio, televisiun e pressa ed internet, saja quai sco abunents u inserents. Per Lebrument è evident che ils meds electronics e mobilis vegnan anc a rinforzar lur puziun en l'avegnir. La clera separaziun tradiziunala dals singuls vecturs na saja betg pli pussaivla e na garanteschia betg success.

Per Hanspeter Lebrument è tabu per l'editur da sa maschadar en ils fatsgs redacziunals sco el ha declerà sin ina dumonda correspudenta ord l'auditori. Per uschè ditg che il dumber d'abunents dad ina gasetta sajan stabils e na mondian betg en digren na dettia i nagins motivs d'intervgnir. El na partia betg adina l'avis dals schurnalists da sias gasettas e quai saja bun uschia.

E cu datti mo ina suletta gasetta dal di pli en il Grischn? A quella dumonda respunda Lebrument: «Tge che la generaziun suenter mai fa, quai na poss jau betg dir.» El giuditgescha ch'i fissia in sbagl ed ina gronda sperdita culturala sche il Grischn perdesia ina da sias gasettas dal di. Per che quai na chapitia betg dovria quai ina intensiva collavuraziun da tuttas duas gasettas e lecturas e lecturs intelligents.

SCHONS

Feasta d'atun an la baselgia sontg Martegn a Ziràn

La tarmegna da la baselgia festivescha igl giubileum da 500 ons

(ticlo) **Schabagn c'igl palantschieu sura da la baselgia sontg Martegn a Ziràn anvida mintg'on egn grand diember da visitaders digl antier mund, stat par egn'eada betga lez agl zenter digl interess.** Nus lagn sadeditgear a la tarmegna, il cor gotic da la baselgia. Egn'ovra digl mester Andreas Bühler da Gmünd an Carizia/Kärnten. Quel veva schon biagieu la baselgia da Tusàn. Ziràn à gieu bi agl tschentgavel tschantaner egn'amprema baselgia. Egn fabricat rectangular cun egn'apsida, egn nischa d'altar. Digl tains da Carl igl Grànd e quella vagnida ramplazada da tres apsidas, egn furma da lez tains ancunaschainta an la diozesa da Cuira. Digls 1100 e igl bietg tardantic vagnieu ramplazo cun egn nav ad egn cor prest quadrat. Igl plafun par las tavlas mala-

geadas eara stgafieu. Agl 16avel tschantaner à igl mester Andreas Bühler fabricagieu la tarmegna gotica. Igl artg da la tarmegna vean ulzo a schlargieu. Digls 1509 à igl bietg savieu vagnir inauguro. Ign supona, c'èar la nav vess stuvieu survagnir egn arvieult. Ca quel e betga vagnieu fatg eara igl spendramaint digl plafun malagieu. Ascheia vagnsa dubel motiv da far feasta. La pastoraziun da Ziràn/Reschen/Runtgaglias a la pastoraziun da Donat anvidan ad egn survetsch divin da giubileum a Ziràn. An dumeingia, igls 4 d'october, la Feasta da la Racolta, porscha igl Cor maschado da Donat a danturn igl rom musical an baselgia sontg Martegn. Suainter igl priedi c'antscheva a las 10:30 datigl pulenta cun caschiel a sprànza ànc egn beal gi d'atun.



La tarmegna gotica sadulza clermeing da la nav baselgia romana.

MAD

reclama

Mythos Nr. 2

PRIVATBANKEN SIND NUR FÜR MILLIONÄRE DA.

Falsch. Bei Wegelin & Co. beginnt die Kundenbeziehung mit einem persönlichen Gespräch. Ein grosses Vermögen ist nicht nötig, wir arbeiten für Millionäre und für solche, die es werden wollen.

Mehr Informationen unter Telefon 081 287 15 15 oder chur@wegelin.ch.



WEGELIN & Co.

PRIVATBANKIERS SEIT 1741

WEGELIN & CO. PRIVATBANKIERS GESELLSCHAFTER BRUDERER, HUMMLER, TOLLE & CO.

CH-7002 Chur Aquasanastrasse 8 Telefon +41 81 287 15 15 chur@wegelin.ch www.wegelin.ch

ST. GALLEN BASEL BERN CHUR CHIASSO GENÈ LAUSANNE LOCARNO LUGANO LUZERN SCHAFFHAUSEN ZÜRICH